

咨請飭諭邱菽園及各華商勿誤信康黨接濟逆匪由

二十六年九月二十日行

為咨會事。案照湖北省於七月間，在漢口租界破獲富有票逆匪唐才常等，供認係康有為主使，擾亂沿江、沿海地方，謀為不軌一案，搜出匪單內列邱菽園為正龍頭。旋由湖南省緝獲唐才常之弟唐才中供稱：邱菽園寄居新嘉坡，家資巨富，康有為常寓其家，唐才常與康有為信札即交邱菽園轉寄。唐才常此次滋事，邱菽園曾捐洋五六萬元。等語。查邱菽園係福建舉人，經商新嘉坡，家道殷實，自必讀書明理，何致甘心從逆，自覆宗邦。諒因在外洋年久，不知中國實在情形，目擊近來中國積弱受侮，急望中國變法自強，遂誤信康有為謬托忠義、捏造誣謗之詞，以為所立保皇會真有造於中國，真有益於皇上。故不惜傾資相助，力贊其成，殆自謂出於忠愛之誠，激於任俠之氣也。不知康有為居心險詐，乘甲午以後，中國人心激昂奮發之秋，掇拾泰西教士唾餘，附會民權，以煽禍亂。迨逆謀既敗以後，反致新政阻格不行，是康非倡新之志士，而為阻新之罪魁，昭然易見。詎康有為逃死，餘魂尚不痛自怨艾，反欲倒行逆施，以逞其報復。此次唐才常作亂，捕獲各要犯僉供係康有為主使，搜出種種逆據，如偽檄文、偽通飭，皆康有為、梁啟超出名。其告各國洋文規條，有“指定東南各省為新造自立之國，不認滿洲為國家”等語，各領事俱所親見。其通飭匪黨偽札，有“欲圖自立，必先自借遵皇權始”等語。明言不認國家，又言借遵皇權，以圖自立，將置我皇上於何地！且“借”之一字，尤為可惡，其狡譎肺肝，已經自行敗露。其往來逆信，於皇上蒙塵西幸，目為西竄，有“此時此機，萬不可失，我軍不可不急圖向西”等語。又其黨句匪入會，動輒以他日富貴許人，似此情詞悖逆，實乃窺竊非常，豈尚有絲毫為我皇上之心乎。其平日保國、保皇之說，果猶足信否乎。現准兩廣德署督部堂來電：惠州之亂，匪黨居然樹立康字旗幟，其偽告示中指斥乘輿，尤屬肆無忌憚，甚至埋藏火藥，炸毀撫署墻垣，轟斃民人多命，凶殘悖逆至此，誠不解南洋諸華商何以甘心接濟之也。本部堂素聞南洋各島旅寓華商，好義急公，不忘宗國，每遇各省水旱荒歉，屢輸巨款，協賑災黎，其眷念中華，愛戴皇上之心，實堪嘉尚。深恐華商中如邱菽園等，誤受康有為虛詞誘惑，於其陰謀異志、叛國殃民之實據，未及聞知。除已將摘叙兩湖自立會匪緊要情節示稿，及勸戒國會文，暨著名匪首單另文咨送冰案外，其逆黨牽涉邱菽園，請飭告誡，勿再接濟資財各節，亦經擇要先行電達，合再將康逆包藏禍心，貽害大局情形，詳晰咨請貴大臣照錄來文，札飭新嘉坡總領事官

立傳邱菽園到案，剴切開導曉諭，俾曉然於康黨之狡詐欺人，勿再為其所愚，若以好義之心，反誤為助逆之舉，擾亂中華，貽害桑梓，冒天下之不韙（韙），為公論所難容，想邱菽園斷不至始終執迷不悟若此也。此外合埠華商，并應令領事官通行告誡，嗣後勿再容留康黨，接濟巨資，擾亂中國，實為緊要。相應咨會，為此合咨貴大臣，請煩查照辦理，見覆施行。

咨 出使英國大臣 交郵政局寄上海文報局轉寄

注 原書目錄題為：咨請飭諭邱菽園及各華商勿誤信康黨接濟逆匪